



słowo tygodnia

KUŽMOT JE

čo. 43

- a) něšto zašmjatane, zwite
- b) konjacy grat za ćahanje wozow
- c) kuchinski nastroj

Prawa je wotmołwa **a**.

Kužmot woznamjenja něšto zašmjatane, něšto, štož ma so rozsukać. Pak su to prawe nitki abo w přenjesenym zmysle »nitki mysłow« abo »organizatoriske nitki«. Znajmjeńša činja problemy a su chětro njepřehladne.

Takle móžeš tež prajić:

- zašmjatk, šmjatk, chaos

Připódla prajene:

Zajimawe je tež, zo wopisuje Hinc Šewc w historisko-etymologiskim słowniku serbšćiny kužmot jako zamotk abo zapřadk husańcow. To je runje tajki zasukany konstrukt njeličomnych nitkow kaž to zapředžene mysle druhdy su.

Přikłady z rěčneho korpusa:

Kužmot mysłow w jeje hłowje lemješe sčasami kóždu zaběru. (Cyblowe suknički. Budyšin 2008)

*Najdlěša bě na wudže. Ale z rólki wzata so namaj zašmjata. Čim bóle nan wotsukowaše, čím mjeńši bywaše wuhlad, zo so *kužmot* rozpušći. (Widžu nana, widžu mać. Budyšin 2007)*

*Wšako je kóždy z nas serbskich dźiwadźelnikow tež do produkcije němskich hrow zapřijaty a njemóže so z tutoho organizatoriskeho *kužmota* tak spěšnje wuswobodzić. (Rozhlad 1998)*